



Ada orang berpendapat bahawa tidak patut Qadyani itu diharamkan sebab tiap-tiap seseorang bebas menganut sesuatu agama. Betul Bung! Keterangan yang nyata tidak ada orang-orang Islam yang membantah anutan-anutan orang seperti Kristian, Hindu, Buddha, dan sebagainya kerana orang-orang itu keadaannya tidak seperti semut putih yang merayap di dalam kayu yang bertujuan merosakkan iktikad orang-orang Islam. Kalau ia tidak mengacau sesuatu agama tentu tidak keberatan tetapi mereka mengaku orang Islam membahas hal-hal Islam pada hal orang Islam tidak mahu mengakuinya? Adakah ini dimaknakan mengacau kebebasan beragama?!

* * *

Perkara Qadyani itu sememangnya heboh lagi terutamanya langkah-langkahnya selalu mencari lawan berbahas. Tuan Hasan Bandung yang sangat disegani oleh orang-orang Qadyani telah mengingatkan bahawa tidak ada orang yang lebih putar belitnya daripada orang-orang Qadyani dan kerana itu janganlah mereka dilawan berbahas-sedang faedahnya mereka tetap Qadyani. Sebaik-baiknya buang jangan dihampirinya!

* * *

A. Senu Abdul Rahman Setiausaha Agung UMNO Malaya telah menafikan tuduhan-tuduhan bahawa UMNO menjalankan sikap “kuku besi” dan “diktator” berhubung dengan soal jus soli dan penyata pelajaran. Terbit penafian ini tentunya timbul dari tuduhan dan kerana itu sekarang terang di dalam UMNO sendiri sudah timbul perasaan itu. Tidakkah ini kerana

orang-orang UMNO telah terasa dikongkong oleh

“sumpah taat setia” kepada pucuk pimpinan?!

* * *

Sekarang ada disebut-sebut bahawa Moscow sudah membebaskan oarang-orang beragama dan buktinya? Di Moscow dikatakan ada 10,000 orang Islam tetapi rancangan menyambut kedatangan orang-orang Indonesia di Masjid Moscow hanya oleh tujuh orang sahaja-iaitu imam, bilal dan lain-lain pegawai masjid. Bagaimana masa Jumaatnya? *Wallāhu a`lam*; kerana orang-orang di sana tidak diberi kelepasan untuk sembahyang. Di mana kebebasan itu, Bung ?! *Samimaun*-kata orang Jawa.

* * *

Di Semanggol sedang diura-urakan untuk menubuhkan sebuah kolej kerana ura-ura ini dibantah oleh penaja Kolej Islam di Klang. Kerana bantahan itu maka banyak timbul cakap-cakap atas bantahan itu. Sebabnya tidak lain kerana orang berpendapat apakah untuk Malaya hanya cara pelajaran yang semacam itu sahaja yang dikehendaki? Ya, banyak orang banyak faham dan pengertiannya sedang banyak pula orang berhajat kepada corak lain daripada yang ada di Kolej Islam di Klang itu.

* * *

Pemuda Jamiah yang disetujui bernaung di bawah Jamiah itu terpaksa dibubarkan oleh penaja-penajanya. Mengapa? Sebabnya tidak lain kerana di dalam Jamiah itu masih banyak orang-orang yang berpendapat mereka akan hidup seribu tahun lagi dan sebab itu tidak perlu melatih pemuda-pemuda bakal menggantikan tempatnya –Tidak perlu- kata mereka kerana Persekutuan Pemuda Islam sudah ada-di sana saudara-saudara boleh bersatu-main bola, main terup dan seumpamanya sedang perkara agama jadi nombor dua-sebab pemimpin-pemimpin Jamiah. – Cemeti al-Farouk.